

Centro di Oranjestad den mas cambionan extraordinario: Grupo local ta desaroya un high-end Business Hotel den centro di Oranjestad



ORANJESTAD(AAN): Durante di un conferencia di prensa extra-ordinario yama pa gobierno di Aruba a haci un anuncio importante y diferente pa Aruba, specialmente centro di Oranjestad.

"Den caya grandi lo ta bay tin un hotel di practicamente 5 strea di 130 camber," Prome Minister Mike Eman a anuncia. "Esaki ta marka un era nobo den caya grandi, na momento cu caya grandi ta bay conoce cambionan grandi." Prome Minister a bisa di ta masha contento cu ta un grupo local ta bay desaroya e proyecto aki. E desaroyadornan ta den combersacionnan cu diferente cadenan di hotel manera Indigo Hotel di Intercontinental, ALoft di Starwood hotels, Hilton Garden Inn, Courtyard by Marriott y Hyatt Place.

"Nos ta kere den caya grandi," Sr. Harms a splica, "sin e sistema di e streetcar y e street scaping, un hotel su so lo no ta factibel, ta un singergia e ta." E desaroyadornan a scoge e idea di un high-end, select service business hotel, despues di a haci research extenso pa e mercado di Aruba. E compania prestigioso, HVS, a haci e research aki pa e grupo local. Segun Lionel Harms, "na e momentonan aki nos ta den proceso di planning, y nos ta premira cu construcion ta cuminsa den 8 luna."

Minister Sevinger, di su banda a duna un splicacion di e singergia cu Sr. Harms a papia di dje. "Cu tur e puzelnan na nan luga, un tipo di proyecto asina ta factibel. Un proyecto cu por pone Aruba riba un diferente nivel cu nos

competidornan regional." Segun e Minister encarga cu infraestructura ta splica, e intencion ta pa incentiva doñonan di edificionan den Caya Grandi inverti den na edificionan pa vivienda tambe, den e pisonan mas halto. Esaki lo extende e movicion, den e centro. Na e momentonan aki una bes cu atardi drenta e actividad den e centro ta caba.

Segun Sr. Sevinger, e meta ta pa e centro sigui su actividadnan. Cu un proyecto, manera un high-end business hotel, sigur lo contribui na e meta aki. Na final di e conferencia di prensa, e 'optie' pa e tereno den caya grandi a worde entrega na e desaroyadornan di e hotel. E tereno na unda e grupo aki lo desaroya e hotel aki ta net pariba di edificio di Bon Bini Bazaar/BID.

Jobfair pa trahadornan di Valero un joke!

ORANJESTAD (AAN)* Diarazon ultimo Valero a tene un jobfair na edificio bieu di International School na Seroe Colorado. E trahadornan a categorisa e jobfair aki como joke na unda cu a tuma nan haci pa asisti na e jobfair y nan ta haya como contesta cu NO tin trabao. Nan CV cu nan a entrega lo wordo teni den consideracion si bin un vacatura habri. Actualmente no tin ningun cupo di trabao ningun caminda nan a wordo informa, tur cos ta yen y mirando e situacion economico ta dificil pa empresario nan ofrece empleo. Un trahador a bisa di ta decepciona mirando con gobierno a parce di move tera y cielo y a haci promesa cu no lo laga nan sin un trabao. Tur hende sa cu nan no lo goza di un salario manera nan tabatin den Valero, pero pa sera e porta asina den nan cara ta pone nan pensa cu politica ta wordo hunga cu nan. Proximamente lo tuma lugar un caso sumario, caminda cu Valero ta pidi retiro masal di e trahadornan cu ainda ta lucha pa nan derecho. Segun e trahadornan riba 60 aña ta esnan cu ta sali mas mal para mirando cu nan lo ricibi peanuts pa tur e añanan y dedicacion na e compania. Hecho ta muestra cu no por tin mucho confianza den Valero mirando cu a anuncia diferente inversion nan sin cu esakinan a wordo concretisa. Entre otro e CEO di Valero Bill Klesse a tuma nos gobierno y henter e pueblo haci ora cu ela bin aña pasa cu su private jet y anuncia un inversion di \$200 miyon cu ta destina den entre otro realizacion di e proyecto di LNG. Esaki a wordo lubida algun luna despues ora cu e ganashi no tabata segun a wordo spera di e mercado di petroleo y sin previo aviso a dicidi di para e proyecto aki inmediatamente. Esaki ta e respet cu Valero tin pa Aruba. Actualmente gobierno ta negociando cu PDVSA cu por bira algo cu desde 2010 tabata negociando cu Valero. Un cos ta sigur y loke mester wordo haci ta pa saka e haf for di cualkier acuerdo, no por entrega patrimonio di nos pueblo sin mas na cualkier grupo. E haf mester wordo salvaguardia y poni bao di maneho di APA NV na unda cu funcionarionan di gobierno por efectua controlnan manera debe ser y cu e haf aki por wordo usa kisas pa crea un balansa nobo den nos economia.

NEVER ENDING STORY!!

